

## Samuwel ena buka wailabuna

### *Lainuwanega*

Niga bukana ba Deivida ena waibada ya giugiuwe. Laidalolo 1 te 4 ba bainewa Diuda lavedi taudiġa i wai badayedina lalasi yawan-nemo. Bi kota laidalolo 5 te 24 ba bainewa Diuda bi Islael lavedi beubeu yawannemo miyemiyedi vaitedi i wai badayedi, taunana ya giugiuwe. Niga bukanemo kota tana kana ġaviya Islael nopoñemo bi kota dobu ġesaudi i wai ġaviyedina kota ya giugiuwe. Bi ya wailoveda te bainewa Deivida, Maimaituwa i wai nuwavaine bi i wai sumāġe. Bi kota ena gebogebo bi ena kaig-waġa ġesaudi kota ya wailoveda. Bi ta kita te Maimaituwa bainewa Deivida i kovoġi bi kota bainewa i lau kuvasa bi Maimaituwa ena gebogebo i noġotikamaġe. Bi Deivida kota pilipili wapewapedi i banavidi laġannemo Islael lavedi i wai badayedi bi Maimaituwa i moito galame ena giuwapa Deivida bi ena dam lelesina lisidimo i noya wataye (2 Sam 7:11-16 ko kita).

## 5

### *Deivida Islael edi ġalibona*

<sup>1</sup> Waibabada Islael nopoñemo Deivida vaitena Ĝiblon malagainemo ai ġemotidi bi a giuwena gado, “Tama tam em dam isuna. <sup>2</sup> Wala nove Sol aubaimai i wai ġalibonana sauginemo, tam tau-nana Islael edi tauwaiġaviya kuna lau etadoliyedi bi kuna waiġaviya. Bi BADA i giuwemna gado,

Samuwel ena buka wailabuna 5:3 ii Samuwel ena buka wailabuna 7:5

'Tam taunana egu lava Islael kwa labedina mai  
sipu taulabedi ya labelabedina mainana. Kota  
tam mainana Islael lavedi kwai badaedi."

<sup>3</sup> <sup>3</sup> Ġome Islael babadidi a tava Ġiblon mala-  
gainemo ġalibona Deivida lisinemo. Bi tana wa-  
ianina i voyena lava bi BADA matedimo. Ġome  
babada olip masinemo Deivida dabanemo buy-  
obuyo a ġini bi ai mataile te tana Islael edi  
ġalibona.

<sup>4</sup> <sup>4</sup> Deivida ena kwalabu ba 30 bi i wai ġalibona  
bi kwalabu 40 nopolimo Islael i waibadaedi.

## 7

### *BADA ena waianina Deivida lisinemo*

<sup>1</sup> BADA Deivida i moito galame te kana ġaviya  
matabudi i lauyovoġedi. Mulinemo ġalibona  
vanuwinemo manuwaubana i miya i waiyawasi.

<sup>2</sup> Deivida i miya moito bi tauguwatana Neitan i  
giuwena gado, "Tagu ba vanuwa visuvisunemo  
kai isana seda, a ġalaġalanemo yà miyamiya. Bi  
bainewa te Maimaituwa ena waianina bogesina  
ba palai nponemo ya kenakena?"

<sup>3</sup> Neitan ġalibona ena giu i wai munena gado,  
"BADA tam lisimmo, taunana aubaina kwa nawa  
bi bai kuna noġonoġotina kwa voiye."

<sup>4</sup> Mba dudubalinemo BADA Neitan i giuwena  
gado,

<sup>5</sup> "Kwa nawa bi egu taupaula Deivida kwa  
giuwena gado, 'BADA niga mainana i giu: Tam  
mote taunana egu vanuwa kuma ġala bi no-  
ponemo yàma miya."

---

<sup>◊</sup> 5:4: 1 Ġali 2:11

Samuwel ena buka wailabuna 7:8 iii Samuwel ena buka wailabuna 7:16

<sup>8</sup> BADA, Neitan i giuwena gado, “Egu taupaula Deivida niga mainana kwa giuwe, BADA saḡasaḡa guletina i giu: Tam wala ba waigeḡa otim bi sipu edi aniyaba gabunemo, sipu kuna labelabedi bi tagu e vinem bi e sako saḡem te egu lava Islael kwai bādaedi. <sup>9</sup> Tam em ani nawamo ba tagu vaitem bi em ġaviya matabudi matammo e lauyovoḡedi. Bi niganana isam yà voiye te ya didiga, maibena waibabada isanawenawedi dobumo. <sup>10-11</sup> Tagu kaka egu lava Islael edi doḡa otina yà vitedi bi dobu wai nuwaubanemo yà sivudi bi sa miya. Gebogebo lavedi a laulaukivi gebogeboyemina ba mote sima voiye munāġe. Bi ġome mote bai kaka ima ka pilipilimi. Bi em ġaviya mote yàmái aninedi bi sima kapilipili munāġemi.

“Tagu BADA bai e giugiuwemna ba yà voiye te tam em tubulelesemo ġalibona sa tubuḡa. <sup>12</sup> <sup>✳</sup>Tagu kaka em tubulelesemo natuotim ġemota yà vine, te gabum ya vai. Bi em laġan i kovina ba em magula edi ani kenamo sa sakom. Tagu kaka ena waibada yà voiye te ya ġailisi. <sup>13</sup> Bi tana tau-nana kaka vanuwa ya ġala isagu anilauduneyena aubaina bi tagu yà voiye te ena waibada ya kena nonoḡa. <sup>14</sup> Tagu tana yài natune bi tana tagu yai tamanegu. Laġannemo bai i voiye waigebona ba tagu yà kovoġina maibena gomana tamana ya kovokovoġina. <sup>15</sup> Bi tagu egu ġoe tana lisinemo mote kaka yàma kaikamaġe, maibena ġalibona Sol lisinemo e kaikaikamaġena bi epaiyanina ba tam e sakom. <sup>16</sup> Em dam lelesina ya tuwawata bi em tubulelesa sai ġalibona bi sa lauetadoli

---

<sup>✳</sup> 7:12: Giu 2:30

Samuwel ena buka wailabuna 7:17 iv Samuwel ena buka wailabuna 11:7

nonoḡa.”

<sup>17</sup> Kamaina bi Neitan wailove i kita biBADA bai matabuna i wai wailovena Deivida i giuvite.

## 11

### *Deivida Ulaiya i wawaidoḡa*

<sup>1</sup> Kwamla laḡandimo kaka ḡalibona sa nawa sa wai ḡaviyā. Diyowab bi ena tauwaiḡaviya baba-didi bi Islael edi tauwaiḡaviya matabudi Deivida i giukamaḡedi a nawa Amon. Bi tana Yelusalemmo i miya gwasa, ḡome Amon lavedi ai ḡaviyedi bi a ḡosa kovidi bi Laba Malagaina a moito galame.

<sup>2-4</sup> Laġan ḡesau aubiganemo, Deivida ḡalibona vanuwina noke dabanemo ena ani kenamo i kena moito bi i moimoito nawa, te waivini mulemulel i kita yovoġe i asiawiwa. Waivinina nawanawalai i vai bi edi vaivai luvanemo i asiwa bi i kaka visuvisu munaġe. Taunana aubaina te Deivida oloto ḡesauna i giukamaġe te waivinina i lau mulimuliye. Bi olotona i tava munaġa bi Deivida i giuwena gado, “Tana Besiba mwanena Ulaiya Ġiti olotona bi tamana Eliyem.” Kamaina bi Deivida oloto i giuwe te i nawa waivinina i waidoli natome lisinemo bi vaitena a kena. Mulinemo te waivini i munaġa ena vanuwemo. <sup>5</sup> Bi waivini mayana vai te bwaga, kamaina bi Deivida ena giu i giukamaġena gado, “Tagu ba e bwaga.”

<sup>6</sup> Taunana aubaina Deivida giu i giukamaġe Diyowab lisinemo bi i giuwena gado, “Ulaiya Ġiti lavana kwa giukamaġe lisigumo.” Kamaina bi Diyowab, Ulaiya i giukamaġe Deivida lisinemo.

<sup>7</sup> Kamaina bi Ulaiya i nato Deivida lisinemo. Bi Deivida i waitalayena gado, “Diyowab ena

Samuwel ena buka wailabuna 11:8 v Samuwel ena buka wailabuna 11:13

tauwaiāviya vaitedi bainewa? Bi bainewa sa waiāviya?”<sup>8</sup> Kamaina bi Deivida, Ulaiya i giuwena gado, “Kwa nawa em vanuwemo bi kaāgem kwa koāgedi\* bi kwai yawasi.” Sauginemo Ulaiya, Deivida ena vanuwa i gosegose kamaāge ba ġome ġalibona ena puyo i giukamaāge Ulaiya ena vanuwemo.<sup>9</sup> Bi Ulaiya mote i nawa ena vanuwemo bi tana ġalibona ena vanuwa mataetinemo Deivida ena tauyava matabudi vaitedi a kena.

<sup>10</sup> Kamaina bi lava ġesaudi ġalibona a giuwena gado, “Ulaiya mote i nawa ena vanuwemo.” Deivida, Ulaiya i giuwena gado, “Ei, tam kuna nawanawana kuna tava munaāga bi bai aubaina mote kuna nawa em vanuwemo?”

<sup>11</sup> Ġome Ulaiya, Deivida i giuwena gado, “Mote i visu te waianina bogesina, Israel bi Diuda edi tauwaiāviya vaitedi palaimo sa miyamiya. Bi kota egu tauwaiāviya badana noko wapumo a lauāgalavu bi sa miyamiya. Bi tagu yā nawa egu vanuwemo yā kani, yā tego bi mwanegu vaitena ka kena, mba ani kitana mote i visu.”

<sup>12</sup> Kamaina bi Deivida, Ulaiya i giuwena gado, “Tam niga ġome kwa miya bi laāgan wailabuinemo kaka yā giukamaāgem kwa munaāga.” Ulaiya Yelusalemmo i miya te laāgan wai labunemo kaka i nawa. <sup>13</sup> Ġome te Deivida, Ulaiya i giuvai bi vaitena a kani, a tego bi Deivida, Ulaiya i waitego bu'uwi. Bi i munaāga ena gabumo taupaula vaitedi a kena bi mote i nawa ena vanuwemo.

---

\* **11:8:** Diu edi vaivaimo lava i nawanawa bi i tavana ba kaāgena sa gei koāga kaka ya sola nawa vanuwemo.

Samuwel ena buka wailabuna 11:14vi Samuwel ena buka wailabuna 12:3

<sup>14</sup> Olaolalemo Deivida, Diyowab ena pepa i gilumi te Ulaiya i vai nawe Diyowab i vite.

<sup>15</sup> Mba pepana nponemo Deivida i gilumana gado, “Diyowab, niga lavana Ulaiya kwa nawe ġaviya diyaotidimo bi laumatamo ko gose kamaġe bi temi koi mulisuwasuwa. Mba mai kauwinemo kaka tana sai peki.”

<sup>16</sup> Kedi ġaviya a ganapaniyedi Laba malagainemo, ġome Diyowab i kita te bamo modomodonemo kedi ġaviya pokapoka sa wai ġaviya, ba Ulaiya ġome i sako. <sup>17</sup> Bi malagainemo ġaviya a lau potiyovo te Diyowab ena tauwaiġaviya vaitedi ai ġaviya bi Deivida ena tauwaiġaviya ġesaudi ai pekidi bi kota Ĝiti olotona Ulaiya vaitena ai peki.

<sup>26</sup> Kamaina bi Besiba i vaiye te mwanena Ulaiya i peki ba tana i wai nuwaboyae. <sup>27</sup> Mba wainuwaboyana mulinemo Deivida lava ġesauna i giukamaġe te i wai doli natome ena vanuwemo. Ĝome waivinina i naġi bi i wai natuna te gomana olotona i bewa. Deivida kauwina i voiyena ba BADA mote i wai nuwavisu.

## 12

### *Neitan Deivida i kaipasine*

<sup>1</sup> <sup>☆</sup>BADA, Neitan i giukamaġe Deivida lisinemo bi i giuwena gado, “Mai maso malagaimo lava labu a miyamiya, ġesauna waiguyauna bi ġesauna wai yamoyamonina.” <sup>2</sup> Bi lava waiguyauna ba i wai sipu bi i wai kau gulata. <sup>3</sup> Bi lava wai yamoyamonina ba ena sipu waivinina ġaubona, lauġemotina i kune vai. Tana ena

---

<sup>☆</sup> **12:1:** Sale 51

Samuwel ena buka wailabuna 12:4 vii Samuwel ena buka wailabuna 12:9

vanuwa lavedi vaitedi a ġamo kauwe te i dididiga. Bi ena kanimo i wai kani bi ena tegomo i wai tego bi kota i bewabewana maibena natuna waivin-inā.

<sup>4</sup> Laġan ġemota taomana i tava lava waiguyau ena malagaimo. Bi lava waiguyauna i wai lavabili te ena ġamoġamo ġesauna mote i vunu bi i vononoġe ena taomana aubaina. Bi geġa te tana i miya moito te lava wai yamoyamonina ena sipu lauġemotina i vunuva te ena taomana aubaina i vononoġi.

<sup>5</sup> Ĝome te Deividia nuwana i laisikesikeina, lava waiguyauna lisinemo bi i giuna gado, “BADA matanemo yà giugiu te niga lavana mai i kauwana ba i visu te maso i peki.” <sup>6</sup> Tana lava wai yamoyamonina mote i launuwatoiye, i visu te sipu lau ewalidi wapedi <sup>4</sup> ya legaudi bi lava wai yamoyamonina ena sipu yai epaiyani.

<sup>7</sup> Neitan, Deividia i giuwena gado, “Lavana ba tam bi niga mainana. BADA Israel edi Maimaituwa i giuwegu, ‘Tagu e vinem te Israel edi ġalibona. Bi kota Sol ena ġailisimo tagu ei yawasanim. <sup>8</sup> Bi Sol ena waibada e vitem bi kota mwanemwanena e vitem. Bi tagu kota e sakom te Israel bi Diuda kwai badayedi. Bamoda niga mwalidi lisimmo sima ġaubo gulata ba tagu ġemoġemotina yai lautawi. <sup>9</sup> Bi tam bai aubaina egu giuvavasaġa kuna laukasaġaġaiye bi niga kauwina gebogebona kuna voiye? Ulaiya Ĝiti lava na tam kunai peki bi mwanena kuna naġivai te mwanem. Tam Amon lavedi edi kepatemo Ulaiya

Samuwel ena buka wailabuna 12:10viii Samuwel ena buka wailabuna 12:17

kunai peki.\* <sup>10</sup> Tam mote ku voteyateyaegu bi Ulaiya mwanena kuna naǵivai te mwanem. Taunana aubaina niganana em dam lelesina ba laǵan matabuna mote nuwavisumo sima miya.’

<sup>11</sup> “Maimaituwa niga mainana i giu, ‘Tagu āgotona te em dam lelesinemo pilipili yà natomedi. Tagu kaka matammo mwanemwanem yà legaudi bi oloto āgesauna yà vite te vaitena sa kena bi lava matabudi matedimo sa kita. <sup>12</sup> Tam ƙandavonemo kuna voiye te bena aiyai mote ima sibe. Bi tagu ba suwalemo yà voiye te Islael lavedi matabudi sa kita.’

<sup>13</sup> Ōome Deivida, Neitan i giuwena gado, “Tagu gebogebo BADA matanemo e voiye.” Bi Neitan Deivida ena giu i waimunena gado, “Kamaina, Maimaituwa em gebogebo i noǵotikamaǵe bi mote kuma peki.

<sup>14</sup> “Bi tam vawaidoǵa kuna voyiena ba mote em vivila BADA lisinemo, taunana aubaina natum ya peki.”

<sup>15</sup> Ōome te Neitan i nawa ena vanuwemo. Bi Deivida natuna Ulaiya mwanena i bewabewana BADA i voiye te i sida gulata. <sup>16</sup> Bi mba sidanemo Deivida gomana aubaina i laupali Maimaituwa lisinemo. Tana i udi bi i sola nawa ena gabumo bi mote ena ani kenamo i kena bi dudubala matabuna senalemo i kenakena. <sup>17</sup> Deivida ena vanuwemo babada magumagulidi a miya moito te tana senalemo i wai patikune bi i kenakenana, a kanuwabigabiga, te maso i kena moito bi vaitena a kani bi geǵa te tana i daboka.

---

\* **12:9:** Mote Deivida otina Ulaiya i waipeki bi eta i voiye te Amon lavedi kepatemo ai peki, mba kamaina te Deivida i waipeki.

Samuwel ena buka wailabuna 12:18ix Samuwel ena buka wailabuna 12:23

**18** Lağan wai 7-na mulinemo gomana i peki bi Deivida ena taupaula tana tainuwatauna a naile bi a giuna gado, “Gomana yawayawasaninemo tada Deivida te giugiuwena mote kalinada i vaivaiye, niganana gomana i peki bi bainewa ta tainuwatau, taunağɑ imai peki munağe?”

**19** Deivida ena taupaula i kitedi ai ġemotidi bi a wai giugiu bi mote i vaiyedi bi i noğoti te gomana male i peki. Taunana aubaina Deivida ena taupaula i waitalayedina gado, “Gomana kaikana i peki?”

Bi tedi a giuwena gado, “Mm, i peki.”

**20** Deivida senalemo† i waipatikunena, i kena moito, i asiwa bi masi panepanedimo tunina i kailolodi bi i waigala kauwa. Bi i nawa BADA ena palai waiyawemo i lauduneye. Laudune mulinemo i munağɑ ena vanuwemo bi ena taupaula i giuwedi te kani a natome te i kani.

**21** Deivida ena taupaula a giuwena gado, “Niga bai kauwina kuna voiye, lağannemo gomana yawayawasanina, i kenakena ba kuna udi bi kuna ġabaġaba. Bi niganana gomana i peki, kaka tam kuna kenamoito bi kwa kanikani.”

**22** Bi Deivida i giuwedina gado, “Lağannemo gomana yawayawasaninemo tagu ei noğota te bena BADA ya launuwatoiyegu bi gomana yai yawasani. Taunana aubaina tagu e udi bi e ġabaġaba. **23** Bi niganana gomana i peki bi bai aubaina yà udi. Mote ġemoġemotina gomana yàmai yawasani munağe, mba eta i doliye.”

---

† **12:20:** Diu lavedi edi vanuwa mote senalemo voivoiyedi bi tedi edi vanuwa ba doğamo kelikelidi.

Samuwel ena buka wailabuna 12:24x Samuwel ena buka wailabuna 12:25

<sup>24</sup> Bi Besiba ma nuwaboyana i miyamiya bi mwanena Deivida i munaḡa tava te i kanuwabi-gabiga. Bi mwanena vaitena a kena te vesala i bwaga bi i wai natuna te gomana olotona i bewa. Bi Deivida gomenina i wai isana, Solomon. Bi BADA, Solomon i kita bi i ġoe kauwe. <sup>25</sup> Taunana aubaina BADA taugiuwatana Neitan i giukamaġe te Deivida ya giuwe te gomenina yai isana, Sedidaiya.‡

---

‡ **12:25:** Isa Sedidaiya banina ba BADA ena ġoe Solomon lisinemo.

**Buk Baibel long Kakabai  
Portions of the Holy Bible in the Kakabai language of  
Papua New Guinea  
Buk Baibel long tokples Kakabai long Niugini**

copyright © 2010-2016 Wycliffe Bible Translators, Inc.

Language: Kakabai

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-05

---

PDF generated using Haiola and XeLaTeX on 11 Nov 2022 from source files dated 9 Oct 2020

8614ef9e-7279-5fda-a20a-4c1b45b2f51a